

四庫全書

經部

欽定四庫全書

樂書卷一百七

宋陳旸撰

樂圖論

雅部

五聲宮商角徵羽

辨四聲
禁四聲
明二變

樂德
樂語

一曰宮

揚雄之論聲生於日以甲乙為角庚辛為商丙丁為徵壬癸為羽戊己為宮至於對或人之問則曰黃鍾以本之中正以平之是五聲之本出於黃鍾九寸之律為宮而宮之為聲以時言之位四時之中以聲言之為四聲之綱猶之宮室之宮居中而覆乎四隅也其聲則和平厚重洪舒而最濁猶牛之鳴窳也其數五成數十絲數八十一應九九之數也其時季夏其日戊己其辰辰戌

丑未其帝黃帝其神后土其精勾陳其蟲裸其獄高山
其生金其勝水其行土其味甘其臭香其色黃其臟脾
其性信其情恐其事思其主唱聲調則廣裕亂則荒驕
君之象也王之宮縣亦取諸此蓋天統以圜鍾為宮地
統以函鍾為宮人統以黃鍾為宮以其尊無二上故也
先儒有十二宮之說豈樂殊貴賤之意耶

二曰商

商金行也其數四成數九絲數七十二其濁次乎宮其

聲明以敏其和溫以斷其律中夷則其日庚辛其辰辛酉其帝少昊其神蓐收其精白虎其蟲毛其嶽華山其時秋其方西其生水其勝木其味辛其臭腥其色白其臟肺其性義其情怒其事言其主和聲調則凝敏亂則陂壞臣之象也臣以度義為忠則商之為言度也先儒謂商章也疆也誤矣

三曰角

角木行也其數三成數八絲數六十四清而不皎濁而

不溷其聲防以約其和潔以淨其律中太簇其日甲乙
其辰寅卯其帝太皞其神勾芒其精蒼龍其蟲鱗其獄
泰山其時春其方東其生火其勝土其味酸其臭羶其
色青其臟肝其性仁其情喜其事貌聲調則圓徹亂則
憂恐民之象也蓋角形之上窮善觸而難制而小民之
難保如之然則角之為觸其來尚矣

四曰徵

徵火行也其數二成數七絲數五十四其清踰於商其

聲泛以疾其和平以切其律中仲呂其日丙丁其辰巳
午其帝炎帝其神祝融其精朱雀其蟲羽其嶽衡山其
時夏其方南其生土其勝金其味苦其臭焦其色赤其
臟心其性禮其情樂其事視聲調則流演亂則哀勤事
之象也蓋徵之為義出無而驗有者也先儒謂徵祉也
止也又謂間聲四調無徵調誤矣

五曰羽

羽水行也其數一成數六絲數四十八其清踰於徵其

聲散以虛其和短以抑其律中應鍾其日壬癸其辰子
亥其帝高陽其神元冥其精玄武其蟲介其嶽恒山其
時冬其方北其生木其勝火其味鹹其臭朽其色黑其
臟腎其性智其情悲其事聽聲調則平和亂則危匱物
之象也先儒謂羽字也舒也蓋羽之為物因時翕張而
已翕而字之張而舒之羽之義也然宮唱而商和則善
太平之樂也角從宮則哀哀國之樂也羽從宮則悲亡
國之樂也自其變成方言之謂之五聲自其比音而樂

言之謂之五樂其實一也先儒謂萬物人事非五行不生非五行不成非五行不滅故五音用火尺則重用金尺則兵用木尺則喪用土尺則亂用水尺則律呂合調天下和平亦臆說也

辨四聲

人感物以形聲聲本無而為有故五聲之別宮為上平聲商為下平聲角為入聲徵為上聲羽為去聲知此可與言聲律矣先儒一宮二商三角四變徵五徵六羽七

變宮之說一何妄耶唐調露中太子使樂工於東宮奏
寶慶之曲李嗣真聞之曰此樂宮商不和君臣相阻之
驗也角徵失位父子不協之兆也殺聲多而哀調苦非
美善之音也數月而太子廢可謂深於音樂者矣由是
言之樂其可妄作哉

禁四聲

昔顏淵問為邦孔子對之樂則韶舞放鄭聲之淫者蓋
以謂樂聲有四狎侮之唱則慢聲也不若凶之不善非

怨之吟則凶聲也不若過之不中常舞於宮酣歌於室
則過聲也不若淫之不正然則北里之曲其淫聲歟為
邦以禮樂為急樂以放鄭聲為先故樂師凡建國所禁
之聲其序如此樂記曰凡姦聲感人而逆氣應之逆氣
成象而淫樂興焉正聲感人而順氣應之順氣成象而
和樂興焉淫樂則多哇之鄭也和樂則中正之雅也先
王建國不先禁雜樂則鄭聲得以亂雅矣古之人將欲
揚善必先遏惡將欲存誠必先閑邪意亦類此然禮樂

之道同歸故曲禮論安民之禮以毋不敬為先周官論建國之樂以禁四聲為先

明二變

五聲者樂之指拇也二變者五聲之駢枝也駢拇枝指出於形而侈於形存之無益也去之可也二變出乎五聲而淫於五聲存之亦無益也削之可也蓋五聲之於樂猶五星之在天五行之在地五常之在人也五聲可益為七音然則五星五行五常亦可益而七之乎其說

必不行矣先儒必為是說者蓋有原焉左氏傳曰為之
七音以奉五聲周語載武王伐商歲在鶉火月在天駟
日在析木之津辰在斗柄星在王龜自鶉及駟七列南
北之揆七同楚語述先王之祀有七事而以天地民四
時之務當之書大傳述聖王巡十有二州論十有二俗
以定七始而以七統當之漢焦延壽京房鄭康成之徒
謂黃鍾為宮太簇為商姑洗為角林鍾為徵南呂為羽
應鍾為變宮蕤賓為變徵是謂七始班固又從而傳會

之謂舜欲聞六律五聲八音七始詠以出納五言汝聽
是其說始於夏書而蔓衍於左傳國語書傳漢志是不
知書之在治忽有五聲而無七始國語之七同有四宮
而無徵也左氏為七音之說蓋八音耳八音以土為主
而七音非土不和故書之益稷禮之樂記其言八音皆
虛其土猶大衍之數虛其一也大衍之數虛其一無害
為五十七音之數虛其土無害為八音也若以七音為
二變在焉是以五聲奉五聲豈其理歟臣嘗讀後周史

武帝時有龜茲人白籍入國最善為胡琵琶聽其所奏之調有七音一曰婆陁力二曰雞識三曰沙識四曰沙侯五曰加濫六曰般瞻七曰侯利篋以應七律之音合為八十四調又知二變之聲出於夷音非華音也蘇夔素號知音嘗援韓詩外傳樂聲所感及月令五音所中並皆有五不聞更加變宮變徵是欲以夏變夷不欲以夷音變夏樂也若夔者可謂知五聲之本矣今天無二日土無二君宮既為君而又有變宮是二君也害教

莫甚焉豈先王制樂之意哉

樂德

周官大司樂以樂德教國子中和祇庸孝友盖中以本道之體其義達而為和其敬達而為祇祇則順行所成庸則友行所成友以事師長孝以事父母則樂德所成終始聖人之德無以加於孝則人道而已若通之於天道則孝不足言之然則自世胄而言謂之胄子自合國子弟而言謂之國子其實一也帝則德全而教略故舜

命夔教胄子以直寬剛簡之四德王則業大而教詳故
周命大司樂教國子以中和祇庸孝友之六德古者教
入之道未嘗不始終以樂文王世子曰三王之教世子
必以禮樂孔子曰成於樂則樂者固教之始終歟太學
之教先入學釋菜以示之禮繼之小雅肄三以示之樂
學雜服者達之以安禮學操縵者達之以安樂是知教
人始終以樂豈特國子而已哉雖萬民之衆司徒固以
六樂教之中樂禮教之和矣周之教國子非特樂德也

盖并與樂語樂舞而教之豈舜教胄子不足於此耶以經求之詩言志歌永言非無樂語也樂則韶舞非無樂舞也特舉樂德該之而已樂德必始於中和者樂為中和之紀故也荀卿亦曰樂之中和

樂語

周官大司樂以樂語教國子興道諷誦言語興道諷為樂語之體誦言語為樂語之用其實一也文王世子曰凡學世子及學士必時春誦夏弦大師詔之瞽宗大樂

正學舞干戚語說命乞言皆大樂正授數又言天子視學養老之禮登歌清廟既歌而語以成之也言父子君臣長幼之道合德音之致禮之天者也鄉射記曰古者於旅也語樂記曰樂終可以語可以道古韞蒙掌弦歌諷誦詩傳曰樂語有五均是知大司樂以樂語教國子以備升歌大致不過如此先樂德後樂語者德為樂之實語為樂之文與四科先德行後言語同序

樂書卷一百七

欽定四庫全書

樂書卷一百八

宋陳旸撰

樂圖論

雅部

八音

八音位

八音次

金

石

土

革

絲

匏

竹

木

八音位

先王作樂莫不文之以五聲播之以八音故列琴瑟於南
列管於東南列磬於西北列鐘於北所以正其位也記曰
列其琴瑟管磬鐘鼓如此然琴瑟絲音也與瓦同於尚宮
管竹音也與匏同於利制鼓革音也與木同於一聲磬石
音也鐘金音也故舉絲以見瓦舉竹以見匏舉革以見木
而五聲八音具矣後聖有作為樂如此其備則簫箏而土鼓

雖鄙朴而不足尚然先王必存而不廢者貴本始之意也

八音次

周官大師掌六律六同以合陰陽之聲皆播之以八音
先金石而土革次之先絲木而匏竹次之八者之序也
國語曰鑄之金磨之石繫之絲木越之匏竹節之鼓而
行之以遂八風太元曰則割竹革木土金繫石彈絲以
和天下梘擬之八風八音所以梘擬八風而遂之八風
所以從律而不失先後之序故其論次亦因之而已

一曰金

金生於土而別於土其卦則兌其方則西其時則秋其風闐闐其聲尚羽其音則銓立秋之氣也先王作樂用之以為金奏焉周官鍾師掌金奏鐸師掌金奏之鼓鼓人掌四金之音聲孟子曰金聲是也金奏之樂未嘗不用鼓特謂之金者以金為主故也禮曰內金示和也又曰入門而金作示情也國語曰金奏肆夏莊子曰金石有聲不考不鳴則奏金而鳴之內以示情外以示和音

之實也

二曰石

石之為物堅實而不動其卦則乾其時則秋冬之交其方則西北之維其風不周其聲尚角其音則辨立冬之氣也先王作樂擊之以為磬之屬焉蓋金石之樂其聲未嘗不相應故莊子曰金石有聲不考不鳴國語曰金石以動之唐李真以車鐸而得徵音之石則其相應可知矣三代之樂既壞於秦漢漢至成帝時尚未有金石

之樂及晉武破符堅之後而四廟金石始備焉後世猥以泗濱石其聲下而石和而以華原所出者易之信乎審一以定和難矣哉

三曰土

土則埏埴以成器而冲氣出焉其卦則坤其方則西南之維其時則秋夏之交其風則涼其聲尚宮其音則濁立秋之氣也先王作樂用之以為埴之屬焉蓋埴簎之樂未嘗不相應也故詩曰伯氏吹埴仲氏吹簎又曰如

埙如篪樂記以埙篪為德音之音周官笙師并掌而教之則其聲相應信矣

四曰草

草去故以為器而羣音首焉其卦則坎其方則北其時則冬其風廣莫其律黃鍾其聲一其音謹冬至之氣也先王作樂用之以為鼓之屬焉蓋執所以兆奏鼓者也二者以同聲相應故祀天神以雷鼓雷鼗祭地示以靈鼓靈鼗享人鬼以路鼓路鼗樂記亦以執鼓合而為德

音周官少師亦以鞀鼓并而鼓之也

五曰絲

絲飾物而成聲其卦則離其方則南其時則夏其聲尚
宮其律蕤賓其風景其音哀夏至之氣也先王作樂弦
之以為琴瑟之屬焉蓋琴瑟之樂君子所常御其大小
雖不同而其聲應一也故均列之堂上焉

六曰匏

匏之為物其性輕而浮其中虛而通笙則以匏為母象

植物之生焉其卦則艮其方東北之維其時春冬之交
其聲尚議其律大呂太簇其風融其音啾立春之氣也
先王作樂慮之以為笙竽之屬焉記曰歌者在上匏竹
在下國語曰匏竹利制蓋匏竹相合而成聲得清濁之
適故也

七曰竹

竹之為物其節直而有制其心虛而能通而利制之音
所由出也其卦則震其方則東其時則春其聲尚議其

律姑洗其風明庶其音溫春分之氣也先王作樂竅之以為簫管之屬焉

八曰木

木者所以合止樂之器其卦則巽其方東南之維其時春夏之交其風清明其律夾鍾其聲一其音直立夏之氣也先王作樂斷之以為敔祝之屬焉樂記曰作為柷楬德音之音祝敔以柷楬為用柷楬以祝敔為體二者之聲二合一止未嘗不相待也

樂書卷一百八

欽定四庫全書

樂書卷一百九

宋 陳旸 撰

樂圖論

雅部

八音 金之屬

鐘制


鑪

鐃

剽

棧

鐘制



呂氏春秋曰黃帝命伶倫鑄十二鐘和五音傳曰黃帝命伶倫與營援作十二鐘考工記鳧氏為鐘兩樂謂之鈇鈇間謂之于子上謂之鼓鼓上謂之鉦鉦上謂之舞舞上謂之甬甬上謂之衡鐘懸謂之旋旋蟲謂之幹鐘帶謂之篆篆間謂之枚枚謂之景于上之權謂之隧十分其鈇去二以為鉦以其鉦謂之鈇間去二分以為鼓間以其鼓間謂之舞修去二分以為舞廣以其鉦之長為之甬長以其甬長為之圍三分其圍去一以為衡圍


大鐘十分其鼓間以其一為之厚為隧六分其厚以其一為之深而圜之典同掌六律六同之和以辨天地四方陰陽之聲以為樂器凡聲高聲磬正聲緩下聲肆波聲散險聲欽達聲羸微聲醵回聲衍侈聲笳奔聲鬱薄聲甄厚聲石凡為樂器以十有二律為之數度以十有二聲為之齊量凡和樂亦如之由是觀之銑于鉦鼓舞鐘之體也甬與衡鐘之柄也舞鼓徑六而長亦六鄭氏以此為鐘口十其長十六也凡樂器以十有二律為之

度數若黃鐘之律九寸十六之而銑取其十以為度則銑徑五寸有奇鉦鼓舞之所居者遞去二分則舞修三寸有奇舞廣二寸有奇林鐘之律六寸十六之而銑取其十以為度則銑徑三寸有奇鉦鼓舞之所居者遞去二分則舞修二寸有奇舞廣一寸有奇餘律之鐘亦然賈公彥曰律各倍以為鐘舉一端也大鐘十分其鼓間以其一為之厚小鐘十分其鉦間以其一為之厚蓋鉦體居銑之六與鼓間同鉦間又殺矣與鼓間異此所以

各十分之以為厚薄鄭氏曰鼓鈺之間同方六而今宜
異又十分之一猶太厚皆非也若言鼓外則近之鼓外
二鈺外一以謂鼓外二間鈺外一間而十分之以其一
為厚薄其說誤矣臣嘗考唐史商盈孫案晁氏樂鉞于
鼓鈺舞之法用算法乘除鑄鐘之輕重高下定編鐘之
制黃鐘九寸五分倍應鐘三十三分有半差為四十八
等口項之量徑衡之圍莫不有齊量焉使工案圖鑄之
凡二百四十枚及其成也音韻與磬協矣今太常所用

舊鐘無慮千枚其間或類古法大抵出盈孫所造外此則器律短而聲高矣五代以來至周時亦嘗考覈聖朝嘗詔李照制管調律而更鑄焉其法悉圓其形而弇一孔其上出柄蟠龍之飾雖和應于一時然較古鐘如鈴而不圓者異矣唐制凡私家不設鐘磬三品以上女樂五人五品以上不過三人是不知周官大胥樂縣之制也

鋪




考工記鳧氏為鍾厚薄之所震動清濁之所由出侈弇之所由興皆有說焉故鍾已厚則石已薄則播侈則柝弇則鬱長角則震是故大鍾十分其鼓間以其一為之厚小鍾十分其鉦間以其一為之厚鍾大而短則其聲疾而短聞鍾小而長則其聲舒而遠聞為遂六分其厚以其一為之深而圜之六分其金而錫居一謂之鐘鼎之齊先王之制鍾也大不出鈞重不過石律度量衡於是乎出所制有齊而無高下厚薄之偏所容有量而無

達回侈弇之過一歸正緩之中聲而已國語曰古者神
瞽考中聲而量之以制度律均鐘則鐘以中聲為本矣
昔齊景公為大鐘鐘大懸下其氣不上薄仲尼譏之周
景王將鑄無射而為之大林單穆公非之魯莊公鑄大
鐘而國小鐘大曹剋規之皆失中聲故也伶州鳩曰鐘
音之器也小者不窳大者不樛則和于物此之謂歟今
夫樂之作也先鼓以警戒後鐘以應之故虞書論堂下
之樂以鼗鼓為先笙鏞次之商詩以置我鞀鼓為先鏞

鼓次之周詩以鼗鼓為先維鏞次之是鼓大麗而象天
鐘統實而象地天先而地從之鼓先而鏞從之先王立
樂之方也鄭氏謂先擊鐘次擊鼓以奏九夏是徒知鐘
鼓之文不知用鐘鼓之意也仲尼曰樂云樂云鐘鼓云
乎哉以為樂在於鐘鼓則鐘鼓樂之器而器非樂也以
為不在于鐘鼓則鐘鼓不耘吾無以見聖人矣世傳為
鐘者多矣或謂炎帝之孫鼓延或謂黃帝之臣營援或
謂堯舜之臣倭豈皆有所傳聞然邪臣竊嘗論之虞夏

之時小鐘謂之鐘大鐘謂之鎛周之時大鐘謂之鐘小
鐘謂之鐃則鐃之為用其實編鐘也編鐘之用其實歌
鐘也一器而三名之各有攸趨爾

鐃 剝 棧



古之聖人本陰陽別風聲審清濁作十有二鐘主十有二月之聲罇亦如之傳曰黃帝使營援鑄十有二鐘加五音以詔英韶所以放升降之氣道天地之和周人因之凡為樂器以十有二律為之數度以十有二聲為之齊量言律則知聲之為鐘言聲則知律之為管蓋數本起於黃鐘始於一而三之歷十二辰而五聲備以十二辰之鐘寓十二律之聲此中聲之所由出而鐘律所以和諧也宋史所載漢中得銅鐘十二豈古鐘歟莫非鐘

也大者謂之鑪以民功為大故也書言笙鏞詩言鼗鼓
維鏞鏞鼓有數是已小者謂之棧以象功之淺者也昔
晉人得鐘長三寸口徑四寸銘曰棧是已若夫大而不
鏞小而不棧則又掠其大小之聲而歸於中焉其斯以
為剽歟儀禮大射作階之東笙磬其南笙鐘其南鐃西
階之西頌磬其南笙鏞其南鐃皆南陳國語曰細鈞有
鐘無鐃昭其大也大鈞有鐃無鐘甚大無鐃鳴其細也
蓋細鈞角徵也必和之以大故有鐘無鐃大鈞宮商也

必和之以細故有鐃無鍾則鐃小鍾大明矣晉語左傳鄭伯嘉納魯之寶鄭人賂魯侯歌鍾二肆及其鐃韋昭杜預皆以鐃為小鍾然言歌鍾及其鐃則鍾大鐃小可知鍾師掌金奏大鍾也鐃師掌金奏小鍾也許慎曰鐃鐃于之屬所以應鍾磬也於理或然鄭康成謂鐃如鍾而大孫炎郭璞釋大鍾文鐃亦名為鐃不亦失小大之辨歟以經考之自虞至周鐃大而鍾小自周公制禮鍾大而鐃小雖有改制大名無變大小之實也秦漢以來

鍾鑄之制小者或數寸大者或容千石皆不本律度
故梁去衡鍾而設鑄隋疑無射之鑄無合曲之義乃襲後
周以十二鑄相生擊之聲韻始克諧矣聖朝之初鑄鍾
有三調六曲更詔依均擊之與編鍾相應要之失細大
之制非成周制作之意也傳曰黃鍾之鍾容秬黍一斛
一斛八斗為度國語曰度律均鍾以定中聲白虎通曰
鑄者時之聲也節度之所生也有節度則萬物昌無節
度則萬物亡斯言信矣

樂書卷一百九

欽定四庫全書

樂書卷一百十

宋 陳旒 撰

樂圖論

雅部

八音

編鐘

歌鐘

青鐘

赤鐘

黃鐘

白鐘

黑鐘

和鐘

覺鐘

銘鐘


鐘聲上

鐘磬中

鐘聲下

修

編 鐘 十 二 枚



先王作樂以十有二律爲之數度以十有二聲爲之齊
量紀之以三平之以六歸於十二天之道也然則以十
有二辰正鐘磬樂縣之位豈他故哉凡以齊量數度考
中聲順天道而已蓋編鐘十二同在一虞爲一堵鐘磬
各一堵爲肆春秋傳歌鐘二肆則四堵也小胥之職凡
縣鐘磬半爲堵全爲肆是鐘磬皆在所編矣磬師掌教
擊磬擊編鐘於鐘言編則磬可知明堂位曰叔之離磬
編則雜離則特謂之離磬則特縣之磬非編磬也言磬

如此則鐘可知也荀卿言縣一鐘大戴禮言編縣一言
特縣鐘磬如此則編鐘編磬亦可知豈非金石以動之
常相待以爲用乎由是觀之鐘磬編縣各不過十二古
之制也漢之服虔以十二鐘當十二辰更加七律一縣
爲十九鐘隋之牛洪論後周鐘磬之縣長孫紹援國語
書傳七律七始之制合正倍爲十四梁武帝又加濁倍
三七爲二十一後魏公孫崇又叅縣之合正倍爲二十
四至唐分大小二調兼用十六二十四枚之法皆本二

變四清言之也蔽於二變者不過溺於國語書傳蔽於四清者不過溺於樂緯皆非聖經之意也惟聖朝李照范鎮廢四清用十二律之議何其智識之明而遠過於諸子乎李照雖知去四清而不知去二變猶不去四清也將何以成和樂邪真目論也

編鐘宮縣用之先儒謂設於甲丙庚壬之位十

二律各有正聲又取黃鐘至夾鐘四律爲清聲此牛洪據鄭康成及樂緯之說也

古者編鐘編

磬登歌用之以節歌句故堂上擊黃鐘特鐘而堂下編鐘應之擊黃鐘特磬而堂下編磬應之上下唱和之道

也

青鐘

赤鐘

黃鐘

白鐘

黑鐘

昔黃帝作三聲以正五鐘一曰青鐘大音二曰赤鐘心
三曰黃鐘涵光四曰景鐘昧其明五曰黑鐘隱其帝五
聲既調然後作五行淮南子謂孟秋之日西館御女白
色白絳撞白鐘是也尚書大傳天子左五鐘右五鐘出
撞黃鐘左五鐘皆應然後少師奏登車告出也入撞蕤
賓左五鐘皆應然後少師奏登堂就席告入也由是觀

之黃鐘所以奏肆夏也蕤賓所以奏采薺也出撞陽鐘而陰應之是動而節之以止易序卦物不可以終動之意也入撞陰鐘而陽應之是止而濟之以動易序卦不可以終止之意也樂師言行以肆夏先於趨以采薺豈主出言之邪禮記趨以采薺先於行以肆夏豈主入言之邪大戴禮言步中采薺趨中肆夏誤矣後世奏永至之樂爲行步之節豈倣古采薺肆夏之制歟

和鐘

禮記曰內金示和也郊特牲曰以鐘次之以和居參之也蓋鐘之爲樂過則聲淫中則聲和垂之和鐘非淫聲之鐘也然鐘之大者十分其鉦間以其一爲之厚已厚則石已薄則播侈則十分其鉦間以其一爲之厚已厚則石已薄則播侈則柝弇則鬱長角則震大而短則聲疾而短聞小而長則聲舒而遠聞所謂和鐘者一適厚薄侈弇小大長短之齊以合六律六同之和而已左傳所謂鐘小不窕大不橈和於物是也昔宋武帝太極殿前鐘聲嘶矣帝問張

永永對以鐘有銅滓乃鑿而去之聲遂清越何知音之審耶

釁鐘

古者罷成而釁以血蓋所以厭變恠禦妖釁釁鐘之釁謂之釁猶治荒謂之荒治亂謂之亂也周官天府上春釁寶罷荆王伐吳將殺沮衛履融釁鼓則釁鐘鼓之法其來尚矣周之所釁非特此也大司馬之於軍罷小子之於邦罷卜人之於龜雞人之於雞太祝之於逆牲小

祝之於祈號圉師之於廐女巫之於浴皆在所釁焉齊
宣王之時將以牛釁鐘而以羊易之夫以牛釁鐘禮也
以羊易牛仁也不忍牛之觶觶而廢釁鐘是愛牛不愛
禮非仁術也仁心而已惻隱牛之就死而易以羊是愛
牛不廢禮非仁政也仁術而已聖朝祖宗軫不忍之仁
廢釁鐘之禮好生之德曷其至哉

銘鐘

昔晉克洛之後秦有圖敗晉功魏顓以身却退秦于輔

氏親止杜回具勲銘之景鐘嘗觀顓帝居位文德者錫以鐘聲武德者錫以干戈又傳曰聖王承天功成者賞功敗者罰故樂用鐘由是知古之人其樂用鐘非特賞功於一時抑又銘功於不朽矣

鐘聲上

鐘鼓之聲怒而擊之則武憂而擊之則悲喜而擊之則樂其意變其聲亦變意誠感之達於金石而況人乎今夫鐘之與磬也近之則鐘音亮遠之則磬音彰物固有

近不若遠者遠不若近者不可不知也宋左師每食擊鐘鄭伯夜飲酒擊鐘蓋古之人一飲食之際必擊鐘者所以和志氣而去爭心也其備禍豈不豫哉

鐘聲中

周景王鐘成而伶人告和州鳩必以爲不知其和晉平公鐘成而工人告調師曠必以爲不調者蓋上之作器而民樂之則調和矣徒作器而民莫之樂也雖欲調和其可得乎傳曰樂在人和不在聲然則州鳩師曠之言

其知作器之本歟

鐘聲下

晉獻公卒未葬吳公子札自衛如晉而將宿戚聞鐘聲而異之者以君尚在殯臣未可以樂故也知悼子卒未葬杜蕢自外來聞鐘聲而飲諸臣者以臣尚在殯君未可以樂故也然晉平公悟師曠之飲而罪已孫文子聞季札之言而不悔者其賢不賢亦可知矣

修

爾雅曰徒鼓鐘謂之修謂之鼓鐘與詩之鼓鐘欽欽同
意

樂書卷一百十

欽定四庫全書

樂書卷一百十一

宋 陳旸 撰

樂圖論

雅部

八音

金之屬下

四金通論

金鐸

鐸于

金鐃

金鉦

丁寧

大金鐃

小金鐃

小鉦

金鐸

木鐸

四金通論


聖人作易參天兩地而倚數因參而三之其數六因兩而兩之其數四鼓陽也而六之參天之數也金陰也而四之兩地之數也六鼓四金之音聲以節聲樂以和軍旅以正田役必掌以鼓人者鼓為樂之君故也蓋六鼓之有四金猶六律之有六呂未有能偏廢者也故鐃之

聲淳鐺之聲濁鐺之聲高鐸之聲明淳則陰與陽和故
可以 and 鼓倡而和之故也鐺則承陽而節之故可以節
鼓行而節之故也高則陰勝於陽而可以止鼓退而止
之故也明則陰與陽通而可以通鼓作而通之故也在
易之艮位之終止也位之終止則窮故以漸進繼焉既
濟治之終止也治之終止則亂故以未濟終焉亦六鼓
終於通鼓之意也大司馬言鐺鐺則鳴之而已鐸則或
振或攬其用則先鐺而後鐸與此不同者此言理之序

大司馬言用之序故也然大司馬不言鐃者以大司馬方習戰陳之事非倡和之時故也釋名金鼓校号也將帥號令之所在也左傳曰凡師有鐘鼓曰伐呂氏春秋曰金鼓所以一耳也法令所以一心也孫子曰夫金鼓所以一人之耳目也人既專一則勇者不得獨進怯者不得獨退此一衆之法也由是觀之金鼓之用於軍旅則將軍之氣一軍之形候也况用之以節聲樂者乎後世以角代金非古制也

鐔

金




周官小師掌六樂聲音之節與其和鼓人掌六鼓四金之音聲以金鐃和鼓自金聲之淳言之謂之鐃自和鼓之倡言之謂之和其實一也蓋其形象鐘頂大腹擦口弇上以伏獸爲鼻內縣子鈴銅舌凡作樂振而鳴之與鼓相和後周平蜀獲其鼙太常卿斛斯證觀曰鐃于也以芒筒撝之其聲極振乃取以合樂焉國語曰戰以鐃于儆其民也又黃池之會吳王親鳴鐘鼓鐃于振鐃則鐃之和鼓以節聲樂和軍旅其來尚矣後世之制或爲

兩馬之形或爲蛟龍之狀引舞用焉非周制也

宋史云廣漢什

闕人段祖以鐸于獻始興于鑑其器高三尺六寸六分圓二尺四寸形圓如甬色黑如漆甚薄上有銅馬以繩縣之令去地尺餘灌之以水又以鼙盛水於下以芒當網跪注鐸于以網振芒則其聲清音如雷良久乃絕樂書曰凡金爲樂之器有六皆鐘類也鐸于圓如雅頭上大小

金 鉦 丁 寧



周官鼓人以金鐻節鼓司馬職公司馬執鐻軍行鳴鐻
詩曰鉦人伐鼓國語曰鼓丁寧春秋傳曰射汰斬而著
於丁寧說文曰鐻鉦也韋昭曰丁寧鉦也鄭康成曰鐻
如小鐘軍行鳴之以爲鼓節蓋自其聲濁言之謂之鐻
自其儼人言之謂之丁寧自其正人言之謂之鉦其實
一也後世合宮縣用之而有流蘇之飾非周制也先儒
謂非雅樂之器是不稽四金以節聲樂之過也


近代有大銅疊

縣而擊之亦此類

大金鐃

小金鐃


小鉦



象鐃形旁有二十四鉦
飾以流蘇柄中上下通

周官鼓人以金鐃止鼓大司馬卒長執鐃以其聲詭詭然故以鐃名之說文曰鐃小鉦也柄中上下通漢鼓吹曲有鐃歌所以退武舞也豈亦周之遺制歟蓋其小者似鈴有柄無舌執而鳴之以止鼓大者象鐘形薄旁有二十四鐃宮縣用之飾以流蘇蓋應律音而和樂也

鐸 金




周官鼓人以金鐸通鼓兩司馬執鐸三鼓撝鐸振鐸

記曰夾振之而駟伐盛威於中國也司馬法曰鐸聲不
過琅釋名曰鐸度也號今之限度也則鐸大鈴也舞者
振之警衆以爲節是金鐸以金爲舌所以振武事也舞
武事者執之晉荀氏得趙人牛鐸以諧樂亦得古人之

遺也

撝上振之爲撝撝
者止行息氣也

鐸 木



書曰道人以木鐸徇于路記曰振木鐸于朝天子之政也小宰正歲帥治官之屬而觀治象小司徒正歲帥其屬而觀教象之法皆徇以木鐸小司寇正歲帥其屬而觀刑象令以木鐸宮正司烜以之修火禁於國中鄉師凡四時之召以之徇于市朝士師掌國五禁之法以之徇于朝是木鐸以木爲舌所似振文事也故舞文事者執之振文事一也在帝王天子則行而爲政在元聖新王則言而爲教天將以夫子爲木鐸豈非言而教之之

事歟

樂書卷一百十一

欽定四庫全書

樂書卷一百十二

宋 陳旴 撰

樂圖論

雅部

八音

石之屬上

磬制

石磬

玉磬

天球

編磬

離磬

箏磬

笙磬

頌磬

歌磬

塞

磬



一為之厚其厚五分
三分其鼓博以其


注云以一短有半觸其弦

其博為一半端磬令黃鐘其長二寸二分五釐
三分其股博去一以為鼓博其長一寸五分

考工記磬氏爲磬倨勾一矩有半其博爲一股爲二鼓爲三參分其股博去一以爲鼓博參分其鼓博以其一爲之厚已上則摩其旁已下則摩其端磬師掌教擊磬蓋石樂之器也聲樂之象也古之爲磬尚象以制器宣貴夫石哉尚聲以盡意而已鐘圓中規磬方中矩則倨勾一矩有半觸其弦也其博爲一股博一律也股爲二後長二律也鼓爲三前長三律也股非所擊也短而博鼓其所擊也長而狹鄭司農云股磬之上大者鼓其下

小者康成云股外面鼓內面則擊者爲前而在內不擊者爲後而在外內者在下外者在上其大小長短雖殊而其厚均也黃鍾之磬股鼓皆厚二寸則餘磬可推矣史傳論造磬者多矣或謂黃帝使伶倫爲之或謂堯使母勾氏爲之或謂叔爲之以明堂位考之叔之離磬則特縣之磬然則非特縣之磬未必非勾氏伶倫所造也曲禮言立則磬折垂佩考工記言磬折以參五則磬取屈折之義也先儒謂磬之爲言勁也豈因屈折然邪

石 磬



小華之山其陰多磬鳥危之山其陽多磬高山涇水出焉其中多磬則磬石所自固雖不一要之一適陰陽之和者泗濱所貢浮磬而已蓋取其土少而水多其聲和且潤也然其制造之法倨勾一矩有半外之爲股內之爲鼓其博厚莫不有數存於其間已上則摩其旁而失之太清已下則摩其端而失之太濁要之一適清濁之中者薄以廣且厚而已有虞氏命夔典樂擊石拊石至於百獸率舞庶尹允諧者由此其本也蓋八卦以乾爲


君八音以磬爲主故磬之爲器其音石其卦乾乾位西北而天屈之以爲無有曲折之形焉所以立辨也故方有西有北時有秋有冬物有金有玉分有貴有賤位有上有下而親疎長幼之理皆辨於此矣古人論磬嘗謂有貴賤焉有親疎焉有長幼焉三者行然後王道得王道得然後萬物成天下樂之故在廟朝聞之君臣莫不和敬在閨門聞之父子莫不和親在族黨聞之長幼莫不和順夫以一器之成而功化之敏如此則磬之所尚

豈在夫石哉存乎聲而已然擊石拊石堂上之樂也百獸率舞堂下之治也堂上之樂足以兼堂下之治堂下之樂不足以兼堂上之治故昔王阜爲重泉令擊磬而鸞舞則夔之擊磬而獸舞豈無是理哉唐天寶中廢泗濱磬而以華原石代之卒致祿山之禍元白賦詩以譏之誠有意於去鄭存雅矣自時而後有取華陽響石爲七縣焉豈亦得泗濱浮磬之遺乎徐景安謂浮磬擊有五音以七音言之非也

秦刻碑山以頌德曰刻此樂石蓋碑山近泗水故也

磬

玉



帝之乘時以出入其致用在八卦其成功在萬物八音出於八卦則八音萬物之聲也磬出於八卦之乾則磬乾之音也春秋之時齊侯以玉磬賂晉師止兵臧文仲以玉磬如齊告糴禮記郊特牲言諸侯宮架而擊玉磬明堂位言四代樂器而拊搏玉磬則玉之於石類也玉聲則出乎其類矣書言天球在東序詩言受小球大球蓋物之美者莫如玉而球又玉之美出於自然者也先王樂天以保天下因天球以爲磬以其爲堂上首樂之

罷其聲清徹有隆而無殺衆聲所求而依之者也商頌
曰依我磬聲本諸此歟呂氏春秋言堯命夔鳴球以象
上帝玉磬之音傳言金石有聲不考不鳴禮言玉之清
越以長樂也由是觀之鳴球之樂雖出於所考要之其
聲清越以長無異於羽屬鱗屬之鳴也梓人爲筍簾取
羽屬清揚而遠聞者以爲磬簾故擊其所縣而由其簾
鳴取鱗屬以爲筍且其匪色必似鳴矣然則謂之鳴球
非若瀛州青石之磬不擊而自鳴也其鳴也因夔而已

漢武帝建招仙靈閣於甘泉西上有浮金輕玉之磬非古制也其武帝之侈心乎晉賀循奏登歌之簾采玉以造磬隋蘇夔妙達音律造玉磬獻於齊唐制宗廟殿庭用玉磬則玉磬堂上之樂登歌用焉書言拊搏琴瑟以詠而以鳴球爲先義可見矣

通禮義纂曰晉賀循奏登歌之簾采玉造小磬宗


廟殿用玉郊丘用石本去堂上樂以歌故名歌鐘磬唐制設歌磬於壇上之西歌鐘於東近南北向至匏竹立於壇下國語曰蘧篚蒙璆漢樂章曰軒朱璆磬蓋璆與球

同而字異其實一也

治聞記曰隋文帝開皇十四年於翟泉獲玉磬十四垂之於庭有二


神人擊之具聲絕妙國史纂異曰國州得十二玉磬以獻張率更叩其一日晉某歲所造開元傳信記曰太真如最善擊磬搏拊之音明皇令採藍田綠玉爲磬尚方造箕簾流蘇之屬皆金鈿珠翠珍怪之物雜飾之又鑄二金獅子以爲趺其他絲繪緋麗製作精妙一時無比也絲是觀之玉磬十二古之制也益之爲十四復世倍之音之失也至於飾以金珠珍怪跌以金獅騰攫其唐明皇之侈心乎不爲有道之主所取也

編 磬



馨

離馨



磬之爲器昔人謂之樂石立秋之音夷則之氣也蓋其
用編之則雜而小離之則特而大叔之離磬則專簾之
特磬非十二器之編磬也古之爲鐘以十有二聲爲之
齊量其爲磬非有齊量也因玉石自然以十有二律爲
之數度而已爾雅大磬謂之鼗徒鼓磬謂之蹇周官磬
師掌教擊磬擊編鐘言編鐘於磬師則知有編磬矣爾
雅言大以見小磬師言鐘以見磬大則特縣小則編縣
儀禮設倚于頌磬西紘則所謂紘者其編磬之繩歟小

胥凡縣鐘磬半爲堵全爲肆鄭康成釋之謂編縣之十六枚同在一簋謂之堵鐘磬各一堵謂之肆禮圖取其倍八音之數而因之是不知鐘磬特八音之二者爾謂之取其數可乎典同凡爲樂器以十有二律爲之數度以十有二聲爲之齊量則編鐘編磬不過十二爾謂之十六可乎嘗讀漢書成帝時於捷水濱得石磬十六未必非成帝之前工師附益四清而爲之非古制也康成之說得非因此而遂誤歟古有大架二十四枚同一簋


簾通十二律正倍之聲亦庶乎古也

蘇璞曰磬音
以玉飾之

聖朝

元豐中施用李照編鐘阮逸編磬仍下王朴樂二律以
寫中和之聲可謂近古矣然補注四聲以足十六律非
先王之制也


笙 磬



頌

磬

歌磬



大射之儀樂之宿縣于阼階東笙磬西面西階之西頌
磬東面蓋應笙之磬謂之笙磬應歌之磬謂之頌磬笙
磬位乎阼階之東而面西以笙出於東方震音象萬物
之生也頌磬位乎西階之西而面東以頌出於歌聲而
聲出於面言之方也鄉飲酒之禮笙入堂下磬南北面
立鄉射之禮笙入立于縣中西面蓋笙磬在東而面西
頌磬在西而面東笙入立于縣中之南而面北故頌磬
歌于西是南鄉北鄉以西方爲上所以貴人聲也笙磬

吹于東是以東方爲下所以賤匏竹也大射設倚于頌磬西絃頌磬在西而有絃是編磬在西而以頌磬名之特磬在東而以笙磬名之周官眡瞭掌凡樂事播鼗擊頌磬掌太師之縣則頌磬編磬也笙磬特磬也縣則又兼編與特言之然言笙磬繼之以鐘鐃應笙之鐘鐃也笙師共笙鐘之樂是已言頌磬繼之以鐘鐃應歌之鐘鐃也左傳歌鐘二肆是已詩言笙磬同音書言笙鏞以間大鐘謂之鏞則笙鏞特縣之鐘也以笙鏞爲特縣之

鐘則笙磬爲特縣之磬明矣蓋笙震音磬乾音其音皆陽鏞兌音其音則陰是笙磬異器而同音笙鏞異音而同和也然則特磬特鐘編鐘編磬皆各堵而同肆鐃則隨之而已大夫判縣天子倍之而爲宮士去天子之三而爲特諸侯倍士之二而爲軒名位不同樂亦異數故也唐之歌磬編縣十六同一篳篥合二八之聲郊祀設於壇上宗廟設於堂上皆次歌鐘之西節登歌之句非不合周之頌磬也然不知編縣十六同一篳篥鄭康成

之說非先王之制也

寒

徒鼓鐘謂之修徒擊磬謂之寒唐禮書先蠶降神宮縣之樂不用鐃鐘以十二大磬代之與房中之樂同設非先王之制也

樂書卷一百十二

欽定四庫全書

樂書卷一百十三

宋 陳旸 撰

樂圖論

雅部

八音 石之屬

堂上下樂上 堂上下樂下 房中樂

宮縣

軒縣

判縣

特縣

樂縣上

樂縣中

樂縣下

堂上

歌歌歌歌瑟琴

黃鍾鐘 黃鍾磬

歌歌歌歌瑟琴

歌歌歌歌瑟琴

歌歌歌歌瑟琴

歌歌歌歌瑟琴

歌歌歌歌瑟琴

歌歌歌歌瑟琴

歌歌歌歌瑟琴

歌歌歌歌瑟琴

歌歌歌歌瑟琴

歌歌歌歌瑟琴

拊

戛

擊

堂上下樂上

古者治定制禮功成作樂舜之爲樂戛擊鳴球搏拊琴瑟以詠堂上之樂也以象廟朝之治故繼之祖考來格虞賓在位羣后德遜下管鼗鼓合止祝敔笙鏞以間堂下之樂也以象萬物之治故繼之鳥獸蹌蹌禮記文王世子曰登歌清廟下管象武郊特牲曰歌者在上匏竹在下貴人聲也仲尼燕居曰升歌清廟示德也下管象示事也祭義曰昔周公有勲勞於天下成王賜之重祭

升歌清廟下而管象燕禮大射曰升歌鹿鳴四牡皇皇者華下管新宮由此觀之周之升歌不過清廟鹿鳴四牡皇皇者華下管不過象武新宮則舜升歌下管之詩雖無經見要之歌以示德管以示事一也德成而上歌詠於堂上事成而下管吹於堂下豈非無所因爲上有所待爲下邪極而論之堂上之樂以詠爲主則聲依永也堂下之樂以間爲主則律和聲也兩者並用然後上下合奏而不失中和之紀矣然則樂之張陳屢擊必於

堂上祝敔必於堂下何邪曰祝敔罷也憂擊所以作罷也罷則卑而在下作罷者尊而在上貴賤之等也

六始爲律

六間爲呂言以間而不言律與周官言典同意

荀卿曰縣一鐘而尚拊大戴

禮曰縣一磬而尚拊拊爲堂上之樂則一鐘一磬尚拊亦堂上之樂也蓋古者歌詩搏拊而縣興故一鐘黃鐘之特鐘也一磬黃鐘之特磬也方其工之升歌也搏拊而鐘磬作焉黃鐘之鐘鳴於堂上而堂下之編鐘應之黃鐘之磬鳴於堂上而堂下之編磬應之所以節歌者

之句也豈非以歌中聲之詩必假中聲之鐘磬以發其
音邪聖朝堂上之樂不設一鐘一磬而尚拊臣恐未合
先王之制神瞽考中聲之意也

堂上下樂下

古之君子反情以和其志比類以成其行然後發以聲
音文以琴瑟而堂上之樂作矣動以干戚飾以羽旄從
以簫管而堂下之樂作矣琴瑟作於堂上象廟朝之治
簫管作於堂下象萬物之治則德自此顯足以奮至德

之光氣自此調足以動四氣之和其於著萬物之理也何有若夫荀卿謂君子以鐘鼓導志以琴瑟樂心動以干戚從以磬管周頌謂鐘鼓喤喤磬管將將是又合堂上下之樂而雜論之非分而序之故也荀卿以堂上執祝控揭爲似萬物則是以堂上之拊似之誤矣

房中樂

燕禮若與四方之賓燕有房中之樂周禮鐘師教縵樂燕樂之鐘磬漢書曰漢有房中祠樂高祖唐山夫人所

作梁書曰周備六代之樂至秦餘韶武房中而已由是推之房中之樂自周至於秦漢蓋未嘗廢其所異者特秦更爲壽人漢更爲安世魏更爲正世至晉復爲房中也漢惠帝使夏侯寬合之管絃晉武帝別置女樂三十人於黃帳外奏隋高祖嘗謂羣臣曰自古天子有女樂暉遠對曰窈窕淑女鐘鼓樂之則房中之樂也高祖大悅然則房中之樂非無鐘磬也毛萇侯芭孫毓皆云有鐘磬是已鄭康成王肅謂房中之樂弦歌周南召南而

不用鐘磬之節后夫人之所諷誦以事君子也陳統曰
婦人尚柔以靜爲體不宜用鐘至隋牛洪修樂採肅統
之說而然之取文帝地厚天高之曲命嬪御登歌上壽
而已是不深考關雎磬師之過也賈公彥亦謂房中之
樂以祭祀則有鐘磬以燕則無鐘磬是亦文先儒之過
又從而爲之辭也唐禮書房中之樂不用鐘鐃以十二
大磬代之是不知一音不備不足以爲樂也


判 架

夷則鐘
夷則磬

南呂鐘
南呂磬

無射鐘
無射磬

蕤賓鐘
蕤賓磬



姑洗鐘
姑洗磬

夾鐘
夾磬

太簇鐘
太簇磬

黃鐘鐘
黃鐘磬

特

架

堂上

阼階

賓階

特架一肆

樂縣上

樂縣之制自夏商而上未有聞焉自夏商而下其略始見於尚書大傳其詳備於周禮春官以書大傳推之古者天子將出撞黃鐘右五鐘皆應黃鐘在陽陽主動君出則以動告靜而靜者皆和故馬鳴中律步者有容駕者有文御者有數周旋中規折旋中矩立則磬折拱則抱鼓然後奏登車告出也入撞蕤賓右五鐘皆應蕤賓在陰陰主靜君入則以靜告動而動者皆和故狗吠晷

鳴及僕介之蟲莫不延頸以聽在內者皆玉色在外者皆金聲然後少師奏登堂就席告入也然則十二鐘在縣之制權輿於此歟以周禮春官推之大司樂凡樂事大祭祀宿縣遂以聲展之小胥之職正樂縣之位王宮縣諸侯軒縣卿大夫判縣士特縣辨其聲凡縣鐘磬半爲堵全爲肆蓋縣鐘十二爲一堵如墻堵然二堵爲一肆春秋襄十年鄭人賂晉侯歌鐘二肆是也宮縣四面象宮室王以四方爲家故也軒縣闕其南避王南面故

也判縣東西之象卿大夫左右王也特縣則一肆而已
象士之特立獨行也郊特牲譏諸侯宮縣漢武帝高張
四縣晉元帝備四廂金石豈王宮縣歟春秋譏衛仲叔
于奚請曲縣後漢光武賜東海恭王鐘簋之樂豈諸侯
軒縣歟禮大夫無故不徹縣楚子亭郤至爲地室而縣
焉田蚡前庭羅鐘鼓立曲旃豈大夫判縣歟鄉射笙入
于縣中西面則東縣磬而已鄉飲磬階縮雷笙入磬南
則縮縣而已豈士特縣歟通禮義纂曰軒縣三面歌鐘

三肆判縣兩面歌鐘二肆特縣一面惟磬而已其說是也然則鄉射有鄉大夫詢衆庶之事鄉飲酒乃鄉大夫之禮皆特縣者以詢庶賓賢能非爲已也故皆從士制燕禮諸侯之禮而工止四人以從大夫之制意亦類此以儀禮考之大射樂人宿縣于阼階東笙磬西面其南笙鐘其南鐃皆南陳建鼓在阼階西南鼓應鼗在東南鼓西階之西頌磬東南其南鐘其南鐃皆南陳一建鼓在其南東鼓朔鼗在其北一建鼓在西階之東南面鐃

在建鼓之間鼗倚于頌磬西絃由是觀之宮縣四面軒縣三面皆鐘磬鐸也判縣有鐘磬而無鐸特縣有磬而無鐘以王制論之則然以侯制論之又半於王制矣王之卿大夫判縣東西各一肆則諸侯之卿大夫東西各一堵王之士特縣南一肆則諸侯之士一堵可知矣鄭康成曰鐘磬十六在一簾爲一堵杜預曰縣鐘十六爲一肆而後世四清之聲興焉是亦傳會漢得石磬十六遷就而爲之制也服虔一縣十九鐘之說不亦詭哉

樂縣中

大射之儀樂人宿縣于阼階東笙磬西面其南笙鐘其南鐃皆南陳建鼓在阼階西南鼓應鼙在其東南鼓西階之西頌磬東面其南鐘其南鐃皆南陳一建鼓在其南東鼓朔鼙在其北一建鼓在西階之東南面簫在建鼓之間鼗倚頌磬西絃蓋堂上之階自階而左爲阼自階而右爲西笙磬在阼階之東而面西頌磬在西階之西而面東由笙磬而南鐘鐃所以應笙者也由頌磬而

南鐘鑄所以應歌者也階雖分乎東西其鐘鑄南陳一也自阼階堂下言之一建鼓在其西而面南鞀在其東而亦面南焉自西階堂下言之一建鼓在其階之南而面東朔輦在其北而亦面東焉一建鼓在其階之東面南蕩在建鼓之間鼗倚于頌磬之西絃蓋諸侯之樂備三面以爲軒縣大射之儀東西有鐘磬之縣推之則天子宮縣堂上之階笙磬頌磬各十二縣堂下阼階而南特鐘特鑄亦各十二縣西階而南編鐘編鑄亦各十二

縣天數也

魏志曰武帝至漢中得杜夔說舊法始復軒縣磬于今用之受之於杜夔也

樂縣下

陰精之純莫如金陽精之純莫如玉天以陰陽立道乾以西北定位西陰位也於物爲金北陽位也於物爲玉孔子寓象於易揚雄寓象於太玄莫不有是說焉今夫莫尊於天莫親於地先王所以奉事而祭祀之以謂舉天下之物無以稱其德者惟金與玉而已故金罍金爵以禮之圭邸璧琮以祀之則樂以金鐘玉磬固其宜也


昔禹王天下菲飲食而致孝乎鬼神惡衣服而致美乎
黻冕豈有金鐘玉磬不施於天地特施於廟朝哉聖朝
著令天子親祠南郊及大饗登歌用金鐘玉磬可謂得
古人致美之意矣比年以來太樂丞葉防倣唐朝一時
苟簡之制欲移郊祀天地金鐘玉磬施之廟朝至於天
地特用質素石磬而已是厚於自奉而薄於天地豈先
王禮意哉葉防所據雖出於唐求之於經亦不過書有
鳴球格祖考之文然不知書舉祖考以見天地而鳴球

不特施於廟朝也釐而正之實在聖時庶乎神宗皇帝

奉事天地誠意被萬世垂而無窮矣

通禮義纂曰天地尚質用石宗廟及

殿庭尚文用玉磬必用之者聲清正陰陽之祭主於金石也



樂書卷一百十三